

PLÊF DI S. MARTIN VESCU
RUALP E VAL
33022 CJARGNE

La Vita Cattolica
UDIN

SCLARIMENTS

Siôr Diretôr,
cognossinlu par un om libar, o vores che mi sclaris doi
ponte che il So giornâl al à batût in chescj ultins numars.

Il prin al riguarde il Seminari. Al è simpri stât un problema ingredeât: sot di nô, par vie ch'and'ere masse; cumò, par vie ch'and'è masse pôs o nissun. Il vescul al è dut afanôs pe fabriche dai predis che a riscje di sierâsi e al va atôr pe diocesi a fâ propagande, so redut pai fruts. Su la riviste diocesane al à scrit, di fat, che l'etât plui adate e je cuanch'a son galups. Ancje Crist, "a 12 anni ... intuì ed abbracciò la volontà del Padre". A Tumieç, cuant che lu à dit cun tante religjon, no vevi fat câs, se ben che mi pareve une robe meti a pâr un canai cun Crist, che al è unic. Po dopo, preparant la zornade pal Seminari, o soi lâ a leimi il toc di vanzeli di Gjesù tal templi, che al veve memoreât il vescul, e o soi restât scaturît. E je vere che Crist a 12 agns al ere tal templi, vadi in Seminari, ma e jè ancje vere che so mari e so pari lu à cirût ducj spasimâts e, a pene che lu à lumât framieç dai dotôrs, j es à sunadis, lu à gafât e menât a cjase di capot. Salocôr lu à ancje patafât. Sigûr che Crist il so seminari lu à fat a Nazaret, in cjase, e ur à stât sot ai siei gjentôrs fintramai a 28 agns. J semejal che la Madone e veti fate propagande pal templi o pe famee? E si puedil, come che al fâs il vescul, puartâ fûr un toc che, let fin dapît, al è propit dut ledrôs di ce che si smicjave? No par insegnâj al vescul, pal amôr di Diu; dome par no fâsi ridi de int.

Il secont scrupul mi è vignût leint ce che al à scrit Riedo Puppo sul "Furlan in Vatican". "No soi colpe jo - al dîs Puppo - se lis bielîs notizis pal Friûl a vegnin de bande dai predis". Fevelial dai predis ubidients o di chêt disubidients? No soi colpe jò, ma la curiositât e je tremende.

Mandi.

Ai 2 di dicembar dal '79

pre Antoni Beline, plevan